

Resolución Reitoral, do 3 de febreiro de 2021, para a modificación puntual da Resolución do 27 de xaneiro de adecuación da actividade docente na Universidade de Vigo ás novas restricións adoptadas pola Xunta de Galicia o 26 de xaneiro do 2021 por razón da pandemia causada pola COVID-19, ditada en substitución da anterior sobre este asunto coa mesma data

Á vista do decreto 8/2021, do 26 de xaneiro, polo que se adoptan medidas no territorio da Comunidade Autónoma de Galicia para facer fronte á crise sanitaria, na condición de autoridade competente delegada no marco do disposto polo Real decreto 926/2020, do 25 de outubro, polo que se declara o estado de alarma para conter a propagación de infeccións causadas polo SARS-CoV-2, publicada no DOG do 26 de xaneiro do 2021 (nº 16-bis), polo que a asistencia a centros universitarios queda excluída das limitacións de entrada e a saída de persoas do ámbito territorial de cada un dos concellos da Comunidade Autónoma de Galicia considerados individualmente, así como as actividades nos mesmos exclúense asemade das limitacións á permanencia de grupos de persoas en espazos de uso público, tanto pechados como ao aire libre;

Á vista da Orde do 26 de xaneiro de 2021 pola que se establecen medidas de prevención específicas como consecuencia da evolución da situación epidemiolóxica derivada do COVID-19 na Comunidade Autónoma de Galicia, na que se recomenda que as actividades en centros universitarios se realicen de forma telemática sempre que sexa posible; na que se sinala que a actividade docente nas ensinanzas universitarias correspondente ao segundo cuatrimestre comezará, nas tres universidades públicas galegas, o luns 8 de febreiro, restablecéndose a docencia exclusivamente en modalidade non presencial durante o período ao que se estenda a eficacia da medida conforme ao punto cuarto da orde, podendo manterse as probas de avaliación das materias do primeiro cuatrimestre nas datas e modalidades previstas en cada universidade; e na que se establecen diferentes disposicións que afectan ás instalacións e servizos da Universidade,

Á vista da conveniencia de realizar modificacións puntuais na resolución reitoral ditada con data de 27 de xaneiro de 2021, tras recibirse nesta Reitoría novas informacións por parte da Secretaría Xeral de Universidades sobre as posibles interpretacións da normativa citada,

Esta Reitoría

RESOLVE

Primeiro: modificar o punto quinto da resolución reitoral do 27 de xaneiro do 2021, de xeito que onde dí: “que as prácticas curriculares e extracurriculares, tanto en empresas como noutros organismos e institucións situados na Comunidade Autónoma de Galicia, se efectúen na modalidade de teletraballo, sempre que sexa posible. No caso de non ser posible, estas actividades suspenderanse mentres estea en vigor a presente resolución. Constitúen unha excepción o prácticum das titulacións de Educación, que seguirá coa modalidade e coa programación prevista antes da entrada en vigor desta resolución, e as prácticas clínicas en institucións sanitarias, que os centro reprogramarán en función do que acorden con éstas”,

pase a dicir: *“que as prácticas curriculares e extracurriculares, tanto en empresas como noutros organismos e institucións situados na Comunidade Autónoma de Galicia, se efectúen na modalidade presencial, sempre que sexa posible, co acordo da empresa, e en tanto que a mesma poida garantir, cara á realización das prácticas, as medidas de saúde pública previstas, e sen prexuízo do seu desenvolvemento na modalidade telemática se fora preciso. En todo caso, o prácticum das titulacións de Educación seguirá coa modalidade e coa programación prevista antes da entrada en vigor desta resolución. Asemade, os centros reprogramarán as prácticas clínicas en institucións sanitarias en función do que acorden con éstas e consonte ao disposto na instrución 1/2021, da axencia do coñecemento en saúde sobre o reinicio das prácticas universitarias do segundo cuadrimestre nos centros sanitarios do SERGAS en aplicación da orde do 26 de xaneiro de 2021 pola que se establecen medidas de prevención específicas como consecuencia da evolución da situación epidemiolóxica derivada do COVID-19 na Comunidade Autónoma de Galicia (dispoñible en https://acis.sergas.gal/cartafol/Documents/156/01-Instrucion_1_2021_ACIS.pdf) durante a vixencia da mesma”.*

Segundo: engadir un teceiro inciso ao punto noveno da dita resolución do 27 de xaneiro, de xeito que pase a dicir o seguinte:

“que, ata novo aviso, so poderá acceder ás dependencias das bibliotecas da Universidade o persoal adscrito á Biblioteca Universitaria. O PDI con contrato en vigor coa Universidade poderá seguir facendo uso dos servizos que a Biblioteca Universitaria estableza como instrumentos de investigación e docencia, mediante o sistema de cita previa. O alumnado matriculado en TFG ou TFM tamén poderá beneficiarse do servizo de préstamo bibliotecario mediante o sistema de cita previa, do mesmo xeito que se aplica aos estudantes de posgrao, é dicir, 10 obras durante 30 días, segundo o indicado en http://www.perseo.biblioteca.uvigo.es/screens/tprestamo_gag.html”.

O Reitor